

Govor predsjedavajućeg Predstavničkog doma Parlamentarne skupštine BiH Milorada Živkovića na sjednici Sobraanja Makedonije

Skoplje, 07. april 2008.

"Poštovani predsjedniče,
Kolegice i kolege poslanici,
Dame i gospodo, dragi prijatelji

Dozvolite mi da Vas pozdravim u svoje lično ime i u ime Predstavničkog doma Parlamentarne skupštine Bosne i Hercegovine i zahvalim na gostomprimstvu. Veliko je priznanje i izuzetna mi je čast da sam danas u prilici da se obratim ovom visokom Domu.

Prvi put sam u službenoj posjeti Makedoniji i želim da sa vama podijelim svoje prve utiske.

Impresioniran sam napretkom koji je postigla vaša zemlja na putu ka evroatlantskim integracijama, ali i uspjehom u privrednom, ekonomskom, političkom i svakom drugom smislu.

Prirodne ljepote i bogatstva kojim vaša zemlja obiluje predstavljaju još uvijek nedovoljno iskorišten privredni resurs ali i šansu koju ćete vi, ne sumnjam, znati da iskoristite.

Poštovani predsjedniče,

Prilikom Vaše posjete Parlamentu BiH tačno prije godinu dana, razgovarali smo o mnogim pitanjima od zajedničkog interesa i tom prilikom dogovorili da unaprijedimo parlamentarnu saradnju, ali i saradnju na svim drugim nivoima, na obostrano zadovoljstvo.

Kao što vidite, drage kolegice i kolege poslanici, i ovom posjetom smo pokazali da i mi parlamentarci imamo ponekad preći sa priče na djelo i dogovoreno realizovati.

Zemlje Zapadnog Balkana ili Jugoiustodne Evrope spajaju i vežu mnoge istorijske, kulturne ali prije svega ljudske i istorijske veze koje treba iskoristiti na obostrano zadovoljstvo i korist.

Istovremeno, lično mislim da je regionalna kooperacija od presudnog značaja, i da imamo zajedničke strateške ciljeve i da kojih možemo uzajamnom pomoći lakše, a što je postaje sve bitno, i mnogo brže-doći.

U skladu s ovim opredjeljenjem inicirao sam održavanje jedne Regionalne Konferencije o evroatlantskim integracijama u Sarajevu koja bi se trebala održati u narednom periodu i drago mi je da ste vi, ako uostalom i zemlje regiona prepoznali i podržali dobru inicijativu i tim estvorili preduslove za još bolji dijalog i saradnju.

Kolegice i kolege,

Dozvolite mi da kažem par riječi o aktualnim događajima u Bosni i Hercegovini koja vas, sigurno, zanimaju.

Kao što znate prioritetni i nesumljivi spoljnopolitički interes Bosne i Hercegovine su evroatlantske integracije.

Nakon završetka tehničkih pregovora o Sporazumu o stabilizaciji i pridruživanju prošle godine, otvorena je tromjesečna kriza u BiH koja je rješena usklađivanjem Poslovnika o radu oba doma, a paraf na Sporazum 4.12.2007. godine je došao kao nada u bolje sutra, a kao šansa za "udarnički" nastavak rada na svim reformskim procesima.

Uložen je veliki napor da bi se došlo do tog parafa.

Par dana prije nego što smo krenuli u ovu posjetu, Predstavnički dom je raspravljao o tri zahtjeva za hitnim postupkom za usvajanje zakona o reformi polkicijskih struktura u BiH , ključnom i posljednjem zahtjevu Evropske unije pred potpisivanje Sporazuma o stabilizaciji i pridruživanju.

Izjašnjavanje o ovim zakonima će se desiti u ovoj sedmici i tada ćemo definitivno znati na kojem smo putu i kakva je evropska perspektiva BiH. Kao i uvijek, ja sam real-optimista, i očekujem kompromisno rješenje i usvajanje predloga koje je utvrdio naš Savjet ministara.

Iako se konstantno ističe konsenzus oko evropskog puta BiH vidjećemo koliko su sve političke stranke spremne da pomognu te procese, koliko se zalažu deklarativno, a koliko stvarno.

Kao logičan slijed događaja nakon toga, očekujem potpisivanje Sporazuma na Konferenciji ministara spoljnih poslova u Luksemburgu 28. ovog mjeseca, kao posljedicu svih dešavanja nakon parafiranja Sporazuma u Sarajevu 04. decembra prošle godine.

Nakon potpisivanja Sporazuma, svjesni smo da dolazimo u fazu kada ćemo morati pristupiti ispunjavanju preuzetih obaveza ali da se pokažemo kao pouzdan partner koji ispunjava dogovorene obaveze i koji ima jasnu viziju svoje budućnosti unutar Evropske unije.

Dejtonski mirovni sporazum je donio mir u BiH ali i odredio ustavno uređenje Aneksom 4 kao zemlju sastavljenu od dva entiteta: RS i F BiH u kojoj žive tri naroda: Srbi, Hrvati i Bošnjaci.

Svjesni smo da to nije idealno rješenje i daće u narednom periodu ići u ustavne promjene, ali sam siguran da uspjeh možemo postići u BiH samo ako beskrajne diskusije zamijenimo predanim radom i saradnjom zasnovanom na poštovanju, konsenzusu i kompromisima.

Osnova buduće politike BiH, po mom mišljenju bi trebala biti zasnovana jedino na Evropskom partnerstvu i obavezama koje iz njega proističu.

U Izvještaju Evropske komisije o napretku BiH za 2007. godinu generalni je stav da postoji napredak u svim monitoring sferama i u političkim, ekonomskim kriterijima i evropskim standardima.

Nadam se da će se taj pozitivan trend nastaviti i biti još bolji i sveobuhvatniji u Izvještaju za 2008. i da ćemo biti veoma brzo pozvani u kandidatski status.

Dame i gospodo,

To je bio i vaš prioritet koji ste realizovali još 2005., to je bila vaša težnja i put kojim ste do sada užurbano išli ispunjavajući neophodne uslove i prilagođavajući sve ono što je rečeno da treba prilagoditi.

Veliki je to posao, a vidim da ste to na vrijeme spoznali i uspješno implementirali i ja Vam na tome, gospodine predsjedniče, kolegice i kolege poslanici ovog visokog Doma - čestitam!

Budućnost Balkana je u okviru Evropske unije, mislim da je to svima jasno i našim evroskim partnerima a i nama na koje se taj geografski, a često i politički, pojam odnosi.

U isto vrijeme, na putu ka NATO integracijama napravili smo veliki posao i ogroman napredak, u Parlamentu smo, kao naš doprinos osim usvajanja neophodnih zakona na moju inicijativu kao predsjedavajućeg u NATO delegaciji PSBiH usvojili

Rezoluciju o spremnosti BiH za NATO integracije i smatramo je ključnim opredjeljenjem i generalnim stavom koji će realizovati prelaskom na viši stepen saradnje sa NATO-om.

Poštovane kolege,

Znamo problem na koji je vaša zemlja naišla u Bukureštu, na svom putu ka punopravnom članstvu u NATO Pakt, Bosna i Hercegovina vas podržava u vašim nastojanjima a lično smatram da se međusobni problemi trebaju rješavati u duhu tolerancije i međusobnog uvažavanja ne koristeći ih kao metod blokada i ucjena.

Poštovani gospodine predsjedniče i uvaženi poslanici

Dozvolite mi da kažem još nekoliko rečenica o mom viđenju unapređenja odnosa između naše dvije zemlje.

Kada je riječ o bilateralnim odnosima između Bosne i Hercegovine i Makedonije apelujem da se potpišu usaglašeni a do sada nepotpisani sporazumi kao što su:

- Sporazum u oblasti obrazovanja i nauke,
- Sporazum o saradnji i uzajamnoj pomoći u oblasti carina,
- Sporazum o izbjegavanju dvostrukog oporezivanja
- Protokol o veterinarskoj saradnji,

Ne sumnjam da će se prilikom uzajamnih bilateralnih posjeta ova pitanja i riješiti.

Koristim priliku i da pokrenem inicijativu za zaključivanje novih bilateralnih sporazuma kao što su:

- Sporazum o željezničkom i vodnom prevozu,
- Sporazum o dvojnomo državljanstvu,
- Protokol o saradnji u procesu evropskih integracija.

Saradnja Bosne i Hercegovine i Republike Makedonije je dobra na svim poljima i nemamo otvorenih pitanja što ukazuje da odnosi u budućnosti mogu biti samo bolji i uspješniji i da nema razloga za suprotno.

Zato sam i ja danas sa uvažanim zamjenikom a uskoro i predsjedavajućim gospodinom Nikom Lozančićem tu, da Vam prenesemo pozdrave parlamentaraca BiH i pozovemo na dalju i intezivniju saradnju. Lično smatram da kroz formirane parlamentarne grupe prijateljstva čija bi uloga i značaj u budućnosti mogla biti sve veća možemo te odnose učiniti manje formalnim, a više ljudskim što je ujedno i glavni zafdatak i krajnji cilj parlamentarne demokratije.

Poštovani predsjedniče,

Uvaženi poslanici,

Zahvaljujem Vam se na srdačnoj prijemu i nastojanjima da se moja delegacija i ja osjećamo dobrodošli u prijateljskoj Republici Makedoniji.

Želim Vam puno sreće i uspjeha u daljnjem parlamentarnom radu i putu ka Evropskoj Uniji, evroatlantskim integracijama, gdje ćete uvijek imati svesrdnu podršku i pomoć od prijatelja iz Bosne i Hercegovine". (kraj)